



Broj/Број: 01/6-50-1-8-4/07
Sarajevo/Сарајево: 22.5.2007.godine

Z A P I S N I K

4. sjednice Komisije za ostvarivanje ravnopravnosti spolova, održane 22.5.2007. godine, s početkom u 12 sati

Sjednici Komisije za ostvarivanje ravnopravnosti spolova (u daljnjem tekstu:Komisija) prisustvovali su sljedeći članovi Komisije:

Vinko Zorić, Jovan Todorović, Sead Jamakosmanović, Rifat Dolić, Jozo Križanović, Mirjana Malić, Remzija Kadrić i Savo Erić

Opravdano je odsustvovao Halid Genjac.

Sjednici je prisustvovao sekretar Komisije Davorin Semenik.

Za sjednicu je usvojen sljedeći

D N E V N I R E D

- 1) Usvajanje Zapisnika 2. sjednice Komisije;
- 2) Izbor prvog zamjenika predsjedavajućeg Komisije (umjesto Milice Marković);
- 3) Predstavljanje Gender akcijskog plana Bosne i Hercegovine;
- 4) Informacija o posjeti delegacije Komisije Republici Crnoj Gori;
- 5) Pripreme za održavanje tematske sjednice: «Ravnopravnost spolova i mediji»;
- 6) Razmatranje poslaničke inicijative Vinka Zorića za promjene u sastavu Komisije;
- 7) Razmatranje dopisa Agencije za ravnopravnost spolova u vezi s izborom revizora;
- 8) Tekuća pitanja:
 - a) Upoznavanje o aktivnostima za organiziranje posjete Odboru za ravnopravnost spolova Sabora Republike Hrvatske,
 - b) «Udružene žene», Banja Luka, odgovor na dopis Komisije.

Ad.-1. Usvajanje Zapisnika 2. sjednice

Predsjedavajući Komisije Vinko Zorić predložio je raspravu i izjašnjavanje o Zapisniku 2. sjednice Komisije.

Kako nije bilo rasprave o ovoj tački dnevnog reda, Komisija je jednoglasno usvojila Zapisnik 2. sjednice Komisije.

Ad – 2. Izbor prvog zamjenika predsjedavajućeg Komisije (umjesto Milice Marković)

Predsjedavajući je upoznao članove da, umjesto Milice Marković, kojoj je prestalo članstvo u ovoj komisiji, treba izabrati novog prvog zamjenika predsjedavajućeg, pa je pozvao prisutne da daju svoje prijedloge.

Remzija Kadrić predložio je da to bude Mirjana Malić koja se zahvalila na povjerenju ali je kandidaturu odbila zbog principijelnih, prije svega političkih razloga.

Nakon toga je predsjedavajući predložio da se izabere Jovan Todorović, koji je iz iste političke stranke kao i Milica Marković.

Potom se pristupilo glasanju, pa je Komisija jednoglasno

o d l u č i l a

da se za prvog zamjenika predsjedavajućeg Komisije izabere Jovan Todorović.

Ad – 3. Predstavljanje Gender akcijskog plana Bosne i Hercegovine

Direktorica Agencije za ravnopravnost spolova Vijeća ministara BiH Samra Filipović-Hadžiabdić, sa saradnicom, upoznala je prisutne s osnivanjem i radom Agencije u proteklom periodu i naglasila potrebu da se članovi Komisije informiraju prilikom donošenja zakona o činjenici ocjenjivanja usaglašenosti prijedloga zakona sa Zakonom o ravnopravnosti spolova, koje obavlja ova agencija. Nakon toga je ukratko upoznala prisutne sa sadržajem Gender akcijskog plana i njegovim integriranjem u Srednjoročnu razvojnu strategiju BiH i u odgojno-obrazovni sistem.

U raspravi koja je uslijedila, a u kojoj su učestvovali: Rifat Dolić, Mirjana Malić, Jozo Križanović, Remzija Kadrić i Vinko Zorić, ukazano je na probleme u ovoj oblasti, što se naročito ogleda u evidentnom kršenju Zakona o ravnopravnosti spolova političkih stranaka prilikom predlaganja kandidata i izbora imenovanih zvaničnika u izvršnoj vlasti, gdje je zanemarivo mali broj žena. Također se smanjuje procentualno učešće žena u nekim pravosudnim organima, dok su, naprimjer, u Agenciji za ravnopravnost spolova BiH, naprotiv, zaposlene samo žene. Zato je neophodno uporno raditi na promoviranju principa ravnopravne zastupljenosti spolova gdje god je moguće i insistirati na tome, uključujući i odgovarajuće izmjene Izbornog zakona BiH, na kojima bi interesorna grupa uskoro trebalo da počne raditi. Nakon rasprave, doneseni su sljedeći

Z A K L J U Č C I

1. Komisija je informirana o aktivnostima Agencije za ravnopravnost spolova BiH i sadržinom Gender akcijskog plana BiH;
2. Komisija je svjesna neophodnosti nastavka saradnje s Agencijom za ravnopravnost spolova BiH i snažno je podržava;
3. Komisija traži da joj se dostave svi dokumenti koji su proizašli iz rada Agencije za ravnopravnost spolova BiH, kako bi bila informirana i raspolagala relevantnim podacima značajnim za njen rad.

Ad – 4. Informacija o posjeti delegacije Komisije Republici Crnoj Gori

Predsjedavajući je upoznao članove Komisije koji nisu bili u delegaciji koja je putovala u posjetu Odboru za rodnu ravnopravnost Skupštine Republike Crne Gore o njenim rezultatima, nakon čega je konstatirano da je **Komisija Informaciju o posjeti delegacije Komisije Republici Crnoj Gori primila k znanju.**

Ad – 5. Pripreme za održavanje tematske sjednice: «Ravnopravnost spolova i mediji»

S tokom priprema za održavanje tematske sjednice, predviđene Programom rada za 2007., o provođenju propisa o ravnopravnosti spolova u medijskim kućama i kroz medijske sadržaje, članove Komisije upoznao je sekretar Komisije, nakon čega je kroz raspravu zaključeno da forma sjednice bude tematska sjednica/javna rasprava s učesnicima po pozivu (ograničen broj učesnika). Potom je definirana lista učesnika koji će biti pozvani i zaključeno da termin sjednice bude dan prije održavanja sjednice Doma u mjesecu julu. Dogovoreno je da sekretar pokuša osigurati sredstva za pokrivanje putnih troškova učesnika i za zajednički ručak.

Ad – 6. Razmatranje poslaničke inicijative Vinka Zorića za promjene u sastavu Komisije

Vinko Zorić podsjetio je prisutne o poslaničkoj inicijativi koju je podnio na sjednici Predstavničkog doma za izmjene u sastavu Komisije zbog neodgovarajuće spolne strukture članstva što ozbiljno dovodi u pitanje njegovu vjerodostojnost kao parlamentarnog tijela koje treba promovirati i štititi ravnopravnost spolova.

Nakon rasprave u kojoj su se svi članovi Komisije saglasili s razlozima i neophodnošću za promjene u njenom sastavu, usvojeni su sljedeći

ZAKLJUČCI

1. Komisija utvrđuje da je potrebno izvršiti promjene u sastavu Komisije i da se u njen sastav imenuju još dvije žene - poslanici, saglasno odredbama Poslovnika;
2. Komisija u potpunosti prihvata, kao svoje, obrazloženje poslaničke inicijative Vinka Zorića od 29.3.2007. i nalaže sekretaru da, u ime Komisije, podnese prijedlog za uvrštavanje ove tačke dnevnog reda na 9.sjednicu Predstavničkog doma.

Ad – 7. Razmatranje dopisa Agencije za ravnopravnost spolova u vezi s izborom revizora

Direktorica Agencije za ravnopravnost spolova Vijeća ministara BiH Samra Filipović-Hadžiabdić dodatno je obrazložila stav Agencije o pitanju izbora generalnog revizora i zamjenika generalnog revizora u Uredu za reviziju institucija BiH.

Nakon rasprave, u kojoj je učestvovala većina članova Komisije, **zaključeno je** da je stav Komisije o ovom pitanju da uslovi i kriteriji kandidata za izbor na ove odgovorne dužnosti imaju prioritet i treba da budu poštovani, a da, pod uslovima da dva ili više kandidata podjednako ispunjavaju uslove, treba voditi računa o odredbama člana 15. Zakona o ravnopravnosti spolova u BiH, primjenjujući i specijalne mjere iz člana 3. stav 6. Zakona, te je u tom smislu dopis Agencije primljen k znanju i s ovim stavom će Agencija biti upoznata.

Ad – 8. Tekuća pitanja

a) Upoznavanje o aktivnostima za organiziranje posjete Odboru za ravnopravnost spolova Sabora Republike Hrvatske

O aktivnostima za organiziranje planirane posjete Odboru za ravnopravnost spolova Sabora Republike Hrvatske prisutne je upoznao sekretar Komisije, pa je zaključeno da se ova aktivnost nastavi na započeti način.

b) «Udružene žene», Banja Luka, odgovor na dopis Komisije

U vezi s odgovorom Udruženja iz Banje Luke, konstatirano je da su primjedbe o nepoštivanju Zakona o ravnopravnosti spolova u BiH u slučaju imenovanja Vijeća ministara BiH opravdane, te da je provođenje Zakona jedan od permanentnih zadataka ove komisije na kojem će raditi do kraja svog mandata, u saradnji s nadležnim institucijama i nevladinim organizacijama.

U okviru tekućih pitanja predsjedavajući je ukazao na značaj seminara o saradnji institucija na provođenju Zakona o ravnopravnosti spolova, pa je zamolio da, osim sekretara, i članovi Komisije, koji to mogu, prisustvuju seminaru 24. i 25. maja 2007.

Također je sekretar Komisije upoznao članove Komisije da je uputio pismo Komitetu jednakih mogućnosti muškaraca i žena s ciljem organiziranja planirane posjete ovom tijelu Vijeća Evrope, što je primljeno k znanju.

Mirjana Malić informirala je prisutne da je, u ime naše delegacije u Parlamentarnoj skupštini Vijeća Evrope, kandidirana za člana Komiteta jednakih mogućnosti muškaraca i žena.

Nakon što je realiziran dnevni red, u 13,45 sati, završena je 4.sjednica Komisije.

SEKRETAR KOMISIJE

Davorin Semenik

PREDSJEDAVAJUĆI KOMISIJE

Vinko Zorić